

ABIADURA HANDIKO TRENA. «Iritzirik galdetu ere egin gabe inposatutako» egitasmotzat jo dute AHT

Erredakzioa | **BILBO**

Kultur munduko ordezkariak Abiadura Handiko Trenaren (AHT) kontrako aldarrikapenarekin bat egin zuten, atzo, eta AHTren aurkako Plataforma-aren eskaerei atxikimendua agertu zioten. Hala, kultur arloko 30 lagun eta bost taldek larunbatean Donostian egingo den manifestazioan parte hartzera deitu zuten. Herenegun sindikatuek gauza bera egin zuten Gasteizko Legebiltzarrean, eta atzo kultur munduko ordezkarien txanda izan zen.

Durango Pinondo kultur etxean eskaini zuten prentsaurrekoa horretarako; eta, atxikimendua agertu duten guztien izenean, Unai Iturriaga bertsolariak eta Kirmen Uribe, Juan Luis Zabala eta Aitor Zubero goitia idazleek hitz egin zuten.

Atxikimendua agertu dutenen artean, besteak beste, honakoak aurkitzen dira: Jose Luis Alvarez Enparantza *Txillardegia*, Iñigo Aranbarri, Pako Aristi, Arrate Egaña, Igor Estankona, Joan Mari Irigoien, Juan Martin Elxpuru, Edorta Jimenez, Josu Landa, Iñaki Mendiguren eta Pablo Sastre idazleak; Xabier Amuriza, Jokin Sorozabal eta Igor Elortza bertsolariak; Antton Irusta, Antxon Txarterina eta Joxemari Karre-
ra ipuin kontalariak; Markos Zapiain filosofoa; Martxelo Otamendi EGUNKARIAKO zuzendaria; eta Andoni Tolosa *Morau* abeslaria.

Horiez gain, Basdandere, Sebastopoleko Titiriteroak, Beta-garri, Naun eta Kasketa Kabareta taldeek ere bat egin dute manifestaziorako deialdiarekin.

Bi logika aurrez aurre

Prentsaurrekoan Aitor Zubero goitiak adierazpen bat irakurri zuen, manifestaziorako deialdia egin duten guztien izenean. Zubero goitiak «bi logika aurrez aurre» daudela adierazi zuen, eta AHTren proiektuarekin horietako bat «inposatu» nahi dela «iritzirik galdetu ere egin gabe».

AHTrekin «inposatu» nahi den logika esaldi batean laburbildu zuen idazle bizkaitarrak: «Presaka bizi; presaka ekoiztu; presaka burutu multinazionalen produktuen garraioa hiri handi batetik bestera, tarteko bideari garrantziarik eman barik; gerora kaltea egingo digun zabor-janaria presaka jan; eta, gero, dirutzak ordaindu eginiko kalteak nola hala konpondu eta berriro berdin ekoizten, berdin bizitzen jarraitzeko».

AHT «hiriburuak lerro zuzenen bidez lotu gura dituen egitasmoa» dela adierazi zuen Zubero goitiak, eta proiektu

Larunbateko manifestaziora deitu dute kultur munduko hainbat ordezkariak



30 lagunek eta bost taldek egin dute bat Abiadura Handiko Trenaren kontrako aldarrikapenarekin

hori aurretik definitutako logikarekin erabat lotuta dagoela nabarmendu zuen. «Baina bide zuzena ez da beti arteza. Artezago deritzogu gertuko antolaketa ereduari edota tokian tokiko ekoizpen eta kontsumo orekatuari; artezago hiriz ez ezik, herriz osatutako mapari, aniztasunari, ekosistema eta kultura txikiekiko errespetuari», esan zuen, manifestaziora «hain juxtu horregatik» deitzen dutela gaineratuz.

Ezagutu mundua EGUNKARIArekin!



Ekainaren
17tik
aurrera erosi
EGUNKARIA,
eta irabazi
24 bidaiatarako
txartela



Jaso **DOAN**
elastiko
dotore hau
eta **ZATOZ**
GUREKIN!!



Babeslea:



MUNDUA ULERTZEKO

